

## বাজেটে ২৫ শতাংশ শিক্ষা খাতে বরাদ্দের দাবিতে সমাজতান্ত্রিক ছাত্রফ্রন্টের বিক্ষোভ

যাযাবি রিপোর্ট

সমাজতান্ত্রিক ছাত্রফ্রন্ট কেন্দ্রীয় কমিটির উদ্যোগে প্রস্তাবিত বাজেটে শিক্ষা খাতে বরাদ্দ কমানোর প্রতিবাদ জানিয়েছে। গতকাল জাতীয় বাজেটে ২৫ শতাংশ শিক্ষা খাতে বরাদ্দের দাবিতে ঢাকা বিশ্ববিদ্যালয়ে বিক্ষোভ মিছিল ও সমাবেশ অনুষ্ঠিত হয়। সংগঠনের কেন্দ্রীয় কমিটির সাংগঠনিক সম্পাদক জনার্দন দত্ত নাটুর সভাপতিত্বে অনুষ্ঠিত সমাবেশে বক্তব্য রাখেন দত্তর সম্পাদক মেহেদী হাসান তমাল, প্রচার ও প্রকাশ সম্পাদক ইমরান হাবীব রুমন, ঢাকা বিশ্ববিদ্যালয় শাখার সাধারণ সম্পাদক মলয় সরকার প্রমুখ। সমাবেশে নেতারা বলেন, প্রস্তাবিত বাজেটে শিক্ষা খাতে গতবারের তুলনায় ১১২ কোটি টাকা বরাদ্দ কমেছে এবং গত বছর শুরুতে যা বরাদ্দ ছিল বছর শেষে তার তুলনায় খরচ কম

করেছে আরো ৭১৬ কোটি টাকা। এবার বছরের শুরুতেই কম বরাদ্দ প্রমাণ করে, সরকার শিক্ষার দায়িত্ব অস্বীকার করেছে এবং তা বেসরকারি প্রতিষ্ঠানের হাতে বাণিজ্যিক ভিত্তিতে ছেড়ে দিতে চাইছে। সভায় বক্তারা আরো বলেন, শুধু শিক্ষা খাতেই নয়, অন্যান্য পরিষেবা খাতেও একই অবস্থা। স্বাস্থ্য খাতে বরাদ্দ কমেছে গতবারের তুলনায় দশমিক ৪১ শতাংশ, যাতে গত বছরের তুলনায় খরচ করেছে ২০৯ কোটি টাকা। বিদ্যুৎ-ফ্লালানি ও খনিজসম্পদ খাতে গত বছর বরাদ্দের তুলনায় কম খরচ করেছে ১ হাজার ২৭০ কোটি টাকা। একদিকে বাজেটের আকার বাড়ছে অর্থাৎ জনগণের কাছ থেকে কর ও অন্যান্য মাধ্যমে সরকার বাড়তি টাকা আদায় করেছে অন্যদিকে জনগণের কল্যাণমূলক খাতে বরাদ্দ কমিয়ে দিচ্ছে। এ

বাড়তি বরাদ্দ চলে যাচ্ছে সুদ ও অন্যান্য অনুৎপাদনশীল খাতে। ঋণ এনে জনগণের কল্যাণ হয় না। বরং লুটপাট করে শাসকগোষ্ঠী আর সুদের টাকা জোগান দেয় জনগণ। অনুৎপাদনশীল খাতে প্রয়োজনের তুলনায় বেশি বরাদ্দ দেয়া হচ্ছে মস্তব্য করে সভায় বক্তারা আরো বলেন, প্রতিরক্ষা বাজেট গত বছরের তুলনায় ৯৩৫ কোটি টাকা বৃদ্ধি করেছে এবং এ খাতে বরাদ্দের তুলনায় বাড়তি খরচ হয়েছে ৪৮১ কোটি টাকা। স্বরাষ্ট্র খাতে বরাদ্দ বৃদ্ধি করা হয়েছে ৭১৫ কোটি টাকা, গত বছর বরাদ্দের তুলনায় বাড়তি খরচ করেছে ৩০০ কোটি টাকা। জনপ্রশাসন খাতে বরাদ্দ বৃদ্ধি পেয়েছে ৪ হাজার ৯৪০ কোটি টাকা, গত বছর বরাদ্দের তুলনায় বাড়তি খরচ করেছে ৪ হাজার ২৩ কোটি টাকা।